



Erindisbréf velferðarnefndar

1. gr.

Stjórnskipuleg staða

Velferðarnefnd heyrir beint undir bæjarstjórn. Velferðarnefnd starfar á velferðarsviði.

Deildarstjóri í félagsþjónustu á velferðarsviði er starfsmaður velferðarnefndar, en auk þess starfar með nefndinni sviðsstjóri velferðarsviðs og ráðgjafi í félagsþjónustu.

Auk kjörinna fulltrúa eiga bæjarstjóri og sviðsstjóri velferðarsviðs rétt á að sitja fundi nefndarinnar með málfrlsi og tillögurétti.

2. gr.

Skipan nefndarinnar

Bæjarstjórn kýs fimm fulltrúa og fimm til vara, skv. 37. gr. sveitarstjórnarlaga nr. 138/2011 og 34. og 48. gr. samþykktar um stjórn Ísafjarðarbæjar og fundarsköp bæjarstjórnar.

Súðavíkurbreppur tilnefnir einn áheyrnarfulltrúa, og einn til vara, í nefndina.

Gildir þessi skipun nefndarinnar til 31. desember 2022, þrátt fyrir ákvæði 5. gr. samnings Ísafjarðarbæjar og Súðavíkurbrepps um sérfræðiráðgjöf, vinnslu mála og stjórnun í félagsþjónustu, dags. 29. júní 2020, þar sem segir að Ísafjarðarbær skipi fjóra aðalmenn, og fjóra til vara, og Súðavíkurbreppur einn nefndarmann og einn til vara, frá og með sveitarstjórnarkosningum vorið 2022.

Nefndaskipan skal endurmetin við ofangreind tímamörk.

Kjósa skal í velferðarnefnd á fyrsta eða öðrum fundi nýkjörinnar bæjarstjórnar og er kjörtímabilið það sama og sveitarstjórnar. Bæjarstjórn Ísafjarðarbæjar kýs formann og varaformann velferðarnefndar.

3. gr.

Hlutverk og verkefni

Velferðarnefnd fer með verkefni jafnréttisnefndar samkvæmt lögum nr. 10/2008, um jafna stöðu og jafnan rétt kvenna og karla. Þá fer velferðarnefnd með framkvæmd á lögum nr. 40/1991, um félagsþjónustu sveitarfélaga, lögum nr. 125/1999, um málefni aldraðra, lögum nr. 44/1998, um húsnæðismál, og lögum nr. 38/2018, um þjónustu við fatlað fólk með langvarandi stuðningsþarfir.

Nefndin er bæjarstjórn til ráðgjafar og sinnir verkefnum um félagsleg málefni, s.s. félagslega ráðgjöf, fjárhagsaðstoð, félagslega heimaþjónustu, jafnréttismál, málefni fatlaðra, málefni aldraðra, málefni barna og ungmenna, og málefni flóttafólks.

Nefndin hefur eftirlit með því að samþykkt markmið bæjarstjórnar í þessum málaflokkum nái fram að ganga, og gerir tillögur um úrbætur í þeirri starfsemi sem undir nefndina heyrir. Nefndin hefur umsjón með þeim stofnunum sem undir nefndina heyra og gerir tillögur til bæjarstjórnar um fjárhagsáætlun vegna þessara stofnana og velferðar- og félagsþjónustumálum almennt.

Auk verkefna sem velferðarnefnd hefur með höndum samkvæmt lögum og samþykkt þessari getur bæjarstjórn falið henni ýmis verkefni með erindisbréfi.

Meginhlutverk velferðarnefndar er stefnumótun, en í minna mæli afgreiðsla einstakra mála. Nefndin setur forstöðumönnum og starfsmönnum þeirra stofnana sem undir nefndina heyra starfsreglur um afgreiðslu samsvarandi mála.

4. gr.

Starfshættir

Um starfshætti velferðarnefndar, fundi, ályktunarhæfi og atkvæðagreiðslur gilda ákvæði IV. og VI. kafla samþykktar um stjórn Ísafjarðarbæjar.

Velferðarnefnd kemur saman fyrir luktum dyrum, að jafnaði tíu sinnum á ári. Aukafundi skal halda ef a.m.k. þrír nefndarmenn óska þess. Gert er ráð fyrir að nefndin fundi að jafnaði tvisvar sinnum á ári í fundarsal sveitarstjórnar Súðavíkurbrepps, sbr. samning dags. 28. júní 2020.

Deildarstjóri í félagsþjónustu er ritari velferðarnefndar, en nefndin getur auk þess ráðið sér fundarritara í hans forföllum. Um ritun fundargerða gilda sömu reglur og um ritun fundargerða bæjarstjórnar, sbr. ákvæði í 16. gr. samþykktar um stjórn Ísafjarðarbæjar.

Starfsmaður nefndar sér um undirbúning og boðun funda í samráði við formann nefndarinnar. Fundarboðun skal vera með tölvupósti og tilgreina fundarstað, tíma og dagskrá. Fundarboð ásamt gögnum sem fyrir liggja um þau mál sem taka á fyrir skal sent fulltrúum og öðrum sem seturétt hafa á fundum eigi síðar en einum sólarhring fyrir fund.

Formaður stýrir fundum nefndarinnar og sér um að allt fari löglega fram á fundum þess. Fundur telst ályktunarhæfur ef meirihluti nefndarinnar er mættur á fundi. Í atkvæðagreiðslu ræður afl atkvæða. Mál telst fallið í atkvæðagreiðslu ef atkvæði falla að jöfnu.

5. gr.

Afgreiðsla mála

Velferðarnefnd gerir tillögur til bæjarstjórnar um afgreiðslu einstakra mála sem það fær til meðferðar. Nefndinni er heimilt að fresta afgreiðslu máls nema lög kveði á um að það skuli afgreitt fyrir tiltekinn tíma. Þá er nefndinni heimilt að fela starfsmanni að vinna frekar að úrlausn tiltekins mál og leggja aftur fyrir nefndina til afgreiðslu.

Fulltrúi nefndarinnar á rétt á því að fá bókaða stutta athugasemd um afstöðu sína til máls sem er til meðferðar í nefndinni.

Velferðarnefnd er þó heimil fullnaðarafgreiðsla mála sem ekki varða verulega fjárhag bæjarsjóðs eða stofnana hans, enda sé ekki ágreiningur milli nefndarmanna eða við starfsmann um slíka afgreiðslu. Vald til fullnaðarafgreiðslu máls getur aldrei falið í sér vald til töku ákvörðunar sem gengur gegn fjárhagsáætlun eða öðrum almennum og bindandi lögum og reglum eða áætlunum sem bæjarstjórn hefur sett.

6. gr

Réttindi og skyldur

Um réttindi og skyldur fulltrúa í velferðarnefnd gilda ákvæði sveitarstjórnarlaga og IV. kafla samþykktar um stjórn Ísafjarðarbæjar.

Fulltrúa er skylt að sækja fundi nema lögmæt forföll hamli. Fulltrúa er skylt að boða varmann í forföllum sínum og tilkynna það starfsmanni nefndar. Heimilt að taka þátt í fundi með rafrænum hætti, séu fulltrúi staddur í sveitarfélaginu Ísafjarðarbæ eða í erindagjörðum innanlands á vegum þess. Fer um framkvæmd slíkra funda skv. leiðbeiningum ráðuneytis sveitarstjórnarmála, sbr. 2. mgr. 19. gr. sveitarstjórnarlaga

Hver fulltrúi á rétt á að koma máli á dagskrá fundar, enda skilar hann efni þess til starfsmann nefndarinnar fyrir fundarboðun.

Fulltrúar í velferðarnefnd skulu hafa hag bæjarfélagsins að leiðarljósi við störf sín í nefndinni, en eru ekki bundnir af öðru en sannfæringu sinni, lögum og samþykkt um stjórn Ísafjarðarbæjar í atkvæðagreiðslu um málefni á vegum nefndarinnar.

Fulltrúar eru bundnir þagnarskyldu vegna mála, sem þeir fá vitneskju um í starfi sínu fyrir nefndina og ætla má að leynt eigi að fara skv. eðli máls eða lögum, hvort sem þau varða einka- eða almannahagsmuni. Þagnarskylda helst óbreytt þótt menn hætti setu í nefndinni eða láti af störfum á hennar vegum.

Fulltrúi skal víkja af fundi við umræður og afgreiðslu mála sem varða hann sjálfan, skyldmenni hans eða nánustu venslamenn svo sérstaklega að almennt má ætla að viljaafstaða hans mótist að einhverju leyti þar af. Honum er þó heimilt að gera stuttlega grein fyrir afstöðu sinni áður en hann víkur af fundi.

7. gr.

Lög og reglugerðir

Í störfum sínum skal velferðarnefnd taka mið af þeim lögum og reglugerðum, sem um starfssvið þess gilda hverju sinni.

Þá skal velferðarnefnd fylgja samþykkt um stjórn Ísafjarðarbæjar eins og hún er hverju sinni og svo og ákvæði sveitarstjórnarlaga.

8. gr.

Gildistaka

Erindisbréf þetta byggist á ákvæðum sveitarstjórnarlaga nr. 138/2011 um verkefni sveitarfélaga og starfsemi nefnda á þeirra vegum, stjórnsýslulögum nr. 37/1993, og samþykkt um stjórn Ísafjarðarbæjar og fundarsköp bæjarstjórnar.

Erindisbréf þetta var samþykkt í bæjarstjórn Ísafjarðarbæjar þann 15. september 2022 með vísan til 48. gr. samþykktar um stjórn Ísafjarðarbæjar og tekur þegar gildi. Gildir erindisbréf þetta þar til annað kann að vera ákveðið.

Ísafirði, 15. september 2022

Arna Lára Jónsdóttir, bæjarstjóri